

TRENT'ANN FÀ

*La culpa l'è d'un sàras
cui sò urécc ben giò,
a famm incuntrà un di
ul omm che incöö anmò
al resta insema a mì!*

*E 'mè l'è staia val cunti sü:
'na sira che passàvi in fond a la Baràgia,
m'è passà visin un ganivèll in ghingheri,
i calzuni da tüidd ,i scarp hinn biculüur. . . .*

*'l ma guarda e pö 'l ma fa:
"Bonasira, signorina,
la podi 'cumpagnà?"*

*La facia un pü fularmàva,
al sò fianch ma sun metüva. . . .*

*La vüus da quel fiö,
già l'evi sentüva dü pass föra da cà,
parchè al mées da máag
l'eva sempar in mezz ai pé,
e giüsta cumè 'n merlu
'l ma zifulava adré!*

*Regordi:l'era bell
Ul purtament corretto
L'ha mai slungàa i sò man
(sa pudeva mia alura
in chi temp là,l'eva pecà murtal
carezà i man)
e da 'na sira a l'altra
sa daum apuntament
visin a quella pianta.*

E sóta ai frasch dul sàras. . . .

*Se lüi 'l pudéss parlà
quanti discürs al sa!
Mò ghe passà trent'ann,
ma na quaj vöлта anmò
pàssum in fond a stà stravela. . . .*

*L'è vera,cunt ul prugrèss
hann costruü di cà
ma 'l sàras cunt i so frasch
a l'è restà anmò là.
Quell che però dispias,
l'è pü vidè là sóta
fiöö e tusann par man
giürass eternu amur
cum'en fai nongh
tanti ann fa.*

Angela Menconi Ganna